



# ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆ

## ԴԱՏԱԿԱՆ ԿԱԶՄԻ ՈՐՈՇՈՒՄ

### ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՎԵՐԱԲԵՐՅԱԼ

Քաղ. Երևան

13 դեկտեմբերի 2024 թ.

Սահմանադրական դատարանի դատական կազմը՝

Նախագահությամբ՝ Ա. Վաղարշյանի  
Անդամակցությամբ՝ Հ. Հովակիմյանի  
Վ. Գրիգորյանի

Քննության առնելով Լիանա Մինասյանի և Իվետտա Հովհաննիսյանի  
անհատական դիմումի ընդունելիության հարցը,

#### Պ Ա Ր Զ Ե Ց .

1. Լիանա Մինասյանի և Իվետտա Հովհաննիսյանի (այսուհետ՝ Դիմողներ, ներկայացուցիչ՝ փաստաբան Իրինա Դանիելյան) դիմումը Սահմանադրական դատարան է մուտքագրվել 2024 թվականի նոյեմբերի 22-ին:

Դիմողները Սահմանադրական դատարան ներկայացրած իրենց դիմումում խնդրել են.

«(...) հաստատել, որ ՀՀ քաղաքացիական օրենսգրքի 1230-րդ հոդվածը չի կարգավորում ոչ ժառանգի մեղավորությամբ պարտավորություն կողմից պահանջներ ներկայացնելու համար սահմանված վեցամսյա ժամկետի հետագայում վերականգնման

դեպքում (նոտարի գործողությունների ոչ իրավաչափ ճանաչում և այլն) ժառանգությունն արդեն իսկ ընդունած ժառանգի կողմից ևս վեցամսյա ժամկետի ավարտից հետո ժառանգությունից հրաժարվելու հնարավորության հարցը, ինչը հակասում է ՀՀ Սահմանադրության 60-րդ հոդվածին, որով երաշխավորվում է անձի սեփականության իրավունքը, որի բաղադրատարրն է հանդիսանում նույն հոդվածի 2-րդ մասով երաշխավորված ժառանգելու իրավունքը:

(...) հաստատել, որ թիվ ՎԴ/8813/05/18 վարչական գործով Դատարանի և Վերաքննիչ դատարանի կողմից տրված մեկնաբանությունները, որոնց արդյունքում Դիմողները փաստացի զրկվում են ժառանգության ընդունման վերաբերյալ տեղեկացված որոշում ընդունելու, հակասում են ՀՀ Սահմանադրության 60-րդ հոդվածին, որով երաշխավորվում է անձի սեփականության իրավունքը, որի բաղադրատարրն է հանդիսանում նույն հոդվածի 2-րդ մասով երաշխավորված ժառանգելու իրավունքը: (...) ճանաչել, որ սույն գործով Դատարանը և Վերաքննիչ դատարանը Դիմողների նկատմամբ խնդրո առարկա ՀՀ քաղաքացիական օրենսգրքի 1230-րդ հոդվածը կիրառել են այլ մեկնաբանությամբ, քան նախկինում Սահմանադրական դատարանի կողմից տրված մեկնաբանությունը:

(...) հաստատել, որ թիվ ՎԴ/8813/05/18 վարչական գործով Դատարանի կողմից տրված՝ ՀՀ քաղաքացիական օրենսգրքի 1245-րդ հոդվածի 4-րդ մասի մեկնաբանությունը հակասում է ՀՀ Սահմանադրության 60-րդ հոդվածին, որով երաշխավորվում է անձի սեփականության իրավունքը, որի բաղադրատարրն է հանդիսանում նույն հոդվածի 2-րդ մասով երաշխավորված ժառանգելու իրավունքը»:

2. Ներկայացնելով թիվ ՎԴ/8813/05/18 վարչական գործի դատավարական նախապատմությունը՝ Դիմողները նշում են, որ Արմեն Հովհաննիսյանի մահվան օրը 2017 թվականի նոյեմբերի 11-ն է: Վերջինս Լիանա Մինասյանի ամուսինն էր, իսկ Իվետտա Հովհաննիսյանի՝ հայրը: Դիմողների պնդմամբ՝ պարտատերերի կողմից պահանջ ներկայացնելու վերջնաժամկետը եղել է 2018 թվականի մայիսի 11-ը:

Ըստ Դիմողների՝ Արմեն Հովհաննիսյանի հանդեպ փոխառության ուժով պահանջի իրավունք ունեցող պարտատեր Վյաչեսլավ Ասրյանի կողմից 2018 թվականի

մայիսի 7-ին հայտարարություն է արվել, որը վավերացվել է Երևան նոտարական տարածքի նոտար Արմեն Գրիգորյանի կողմից: Դիմողները գտնում են, որ նշված հայտարարությունն իր բովանդակությամբ նման է պարտատիրոջ կողմից պահանջը ժառանգական զանգվածի մեջ ներառելու դիմումին, սակայն փաստացի տվյալ դիմումը նոտար Արմեն Գրիգորյանի կողմից ձևակերպվել է որպես հայտարարություն և գործնականում չի ներառվել Արմեն Հովհաննիսյանի ժառանգական զանգվածի մեջ, դրա վերաբերյալ որևէ նշում չի կատարվել նոտարական գործում:

Դիմողների պնդմամբ՝ համապատասխան պահանջը պարտատեր Վյաչեսլավ Ասրյանի կողմից նոտար Աննա Աբրահամյանին է ներկայացվել 2018 թվականի օգոստոսի 16-ին, երբ Դիմողների կողմից արդեն իսկ ստացված են եղել ժառանգության իրավունքի վկայագրերը: Ինչ վերաբերում է պարտատեր Վյաչեսլավ Ասրյանի՝ նոտար Արմեն Գրիգորյանի կողմից վավերացված հայտարարությանը, ապա այն ակնհայտորեն չի կարող որակվել որպես պահանջի ներկայացում առնվազն այն պատճառով, որ նշված հայտարարության մասին ժառանգները տեղեկություն չեն ունեցել:

Դիմողները նշում են, որ խնդրո առարկա գործով թե՛ Վարչական դատարանը, թե՛ Վերաքննիչ վարչական դատարանը թույլ են տվել նյութական իրավունքի կուտագույն և ակնհայտ խախտումներ՝ անտեսելով այն հանգամանքը, որ Վյաչեսլավ Ասրյանը նոտար Աննա Աբրահամյանին դիմում է ներկայացրել օրենքով սահմանված վեցամսյա ժամկետի խախտմամբ, իսկ ժամկետի պահպանմամբ նոտար Արմեն Գրիգորյանին ներկայացված հայտարարությունը դիտարկելով որպես պատշաճ դիմում: Ըստ Դիմողների՝ Վարչական դատարանը և Վերաքննիչ վարչական դատարանն անտեսել են նաև այն հարցերը, թե նոտարին Վյաչեսլավ Ասրյանի պահանջը ժառանգության մեջ ներառելուն պարտավորեցնելու դեպքում ինչպե՞ս են ապահովվելու ժառանգների իրավունքները, ինչպե՞ս է վերջիններիս արդեն իսկ ընդունած ժառանգության մասով դիրքորոշում հայտնելու, ժառանգությունն ընդունելու կամ չընդունելու հարցում կամահայտնություն դրսևորելու հնարավորություն ընձեռվելու:

Դիմողները գտնում են, որ ուժի մեջ մտած դատական ակտի և լրացուցիչ ժառանգության իրավունքի վկայագրի առկայության պայմաններում հարկ է գոնե հստակ կարգավորել այն հարցը, թե արդյո՞ք պարտատիրոջ կողմից իր պահանջը ժառան-

գությունն ընդունած ժառանգի ժառանգական զանգվածում այս կամ այն պատճառով (այդ թվում՝ բաց թողնված ժամկետը հարգելի ճանաչվելու կամ նոտարի մերժումն անվավեր ճանաչվելու պարագայում և այլն) վեցամսյա ժամկետից հետո (ժառանգութան իրավունքի վկայագիրն արդեն իսկ ստացած լինելու և ժառանգությունից հրաժարվելու ժամկետից հետո) ներառվելու պարագայում ժառանգին ևս պետք է ժառանգությունից հրաժարվելու հնարավորություն ընձեռվի, քանի որ վերջինս ունի ժառանգության ընդունման հարցում տեղեկացված որոշում կայացնելու իրավունք:

Դիմողները եզրահանգում են, որ ժառանգին պետք է ժառանգությունից հրաժարվելու հնարավորություն ընձեռվի, եթե իրենից անկախ պատճառներով փոփոխվել է ժառանգական զանգվածը, և վերջինս տեղյակ չի եղել դրա մասին: Ըստ Դիմողների՝ նման մոտեցումը նաև կապահովի արդար հավասարակշռությունը ժառանգի և պարտատերերի շահերի միջև:

**3.** Ելնելով դիմումի և կից ներկայացված դատական ակտերի ուսումնասիրության արդյունքներից և ղեկավարվելով «Սահմանադրական դատարանի մասին» սահմանադրական օրենքի 29 և 69-րդ հոդվածներով՝ Սահմանադրական դատարանի դատական կազմը գտնում է, որ սույն անհատական դիմումով գործի քննությունը **ենթակա է մերժման**՝ հետևյալ պատճառաբանությամբ.

Սահմանադրության 169-րդ հոդվածի 1-ին մասի 8-րդ կետի համաձայն՝ Սահմանադրական դատարան կարող է դիմել յուրաքանչյուր ոք՝ կոնկրետ գործով, երբ առկա է դատարանի վերջնական ակտը, սպառվել են դատական պաշտպանության բոլոր միջոցները, և վիճարկում է այդ ակտով իր նկատմամբ կիրառված նորմատիվ իրավական ակտի դրույթի սահմանադրականությունը, ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:

Սահմանադրական վերոհիշյալ նորմն իր ամրագրումն է ստացել նաև «Սահմանադրական դատարանի մասին» սահմանադրական օրենքի 69-րդ հոդվածի 1-ին մասում: Հիշյալ դրույթը սահմանում է այն պայմանները, որոնց միաժամանակյա առ-

կայության պարագայում ֆիզիկական կամ իրավաբանական անձը կոնկրետ գործով անհատական դիմում կարող է ներկայացնել Սահմանադրական դատարան:

Դրանք են՝

ա) երբ կոնկրետ գործով առկա է դատարանի վերջնական ակտը,

բ) երբ սպառվել են ներպետական դատական պաշտպանության բոլոր միջոցները,

գ) երբ վիճարկվում է այդ ակտով իր նկատմամբ կիրառված նորմատիվ իրավական ակտի դրույթի սահմանադրականությունը, ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:

«Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 6-րդ կետի համաձայն՝ Սահմանադրական դատարանը գործի քննությունն ամբողջությամբ կամ մասամբ մերժելու մասին աշխատակարգային որոշում է ընդունում սույն օրենքի 69-րդ հոդվածով նախատեսված այլ դեպքերում:

«Սահմանադրական դատարանի մասին» սահմանադրական օրենքի 69-րդ հոդվածի 2-րդ մասի համաձայն՝ անհատական դիմումը պետք է հղումներ պարունակի նորմատիվ իրավական ակտի այն դրույթներին, որոնց սահմանադրականությունը վիճարկվում է, և հիմնավորումներ, որ նորմատիվ իրավական ակտի հակասությունը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատությունների խախտման՝ հաշվի առնելով նաև համապատասխան դրույթին իրավակիրառ պրակտիկայում տրված մեկնաբանությունը:

Նույն օրենքի 69-րդ հոդվածի 5-րդ մասի համաձայն՝ անհատական դիմումներով գործի քննությունը, ի թիվս այլնի, կարող է մերժվել նաև այն դեպքերում, երբ **անհատական դիմումն ակնհայտ անհիմն է:**

Սահմանադրական դատարանը 2009 թվականի մարտի 17-ի ՍԴԱՌ-21 աշխատակարգային որոշմամբ արձանագրել է, որ «(...) անհատական դիմումների քննությունը կարող է մերժվել նաև այն դեպքերում, **երբ անհատական դիմումն ակնհայտ անհիմն է:** (...) անհատական դիմումն ակնհայտ անհիմն է, երբ, թեև դրանում բարձրացված

հարցը ենթակա է սահմանադրական դատարանի քննությանը, այնուամենայնիվ, **դիմումում չեն բերվում բավարար իրավական փաստարկներ այն հիմնավորելու համար**»: Բացի այդ, «(...) դիմողը պետք է փորձի բավարար կերպով իրավաբանորեն հիմնավորել, թե իր սահմանադրական որ իրավունքներն են խախտվել և ինչ անմիջական պատճառահետևանքային կապ է առկա վիճարկվող օրինադրույթի և իր իրավունքների խախտման փաստի միջև: Նշված պահանջին համապատասխան՝ դիմողը պետք է նաև դիմումում առաջադրված հարցի հիմքում ներկայացնի իրավաբանորեն փաստված հանգամանքներ և նյութեր (...):»:

Այս առումով Սահմանադրական դատարանի դատական կազմը հարկ է համարում ընդգծել, որ Սահմանադրական դատարան ներկայացվող անհատական դիմումում դիմողը պետք է հիմնավորի, թե իր սահմանադրական ո՞ր իրավունքն է խախտվել, և ի՞նչ անմիջական պատճառահետևանքային կապ է առկա վիճարկվող օրինադրույթի և իր իրավունքի խախտման միջև, սակայն քննարկվող դեպքում դիմողը պարզապես հղում է կատարում Սահմանադրության 2-րդ գլխում ամրագրված հիմնական իրավունքների՝ առանց ներկայացնելու վիճարկվող օրինադրույթի և համապատասխան հիմնական իրավունքների ենթադրյալ խախտման փաստի միջև պատճառահետևանքային կապի առկայության բավարար հիմնավորումներ:

Դիմողը սույն անհատական դիմումով Սահմանադրական դատարանի առջև բարձրացրել է ՀՀ քաղաքացիական օրենսգրքի 1230-րդ հոդվածի և 1245-րդ հոդվածի 4-րդ մասի (իրավակիրառ պրակտիկայում դրանց տրված ենթադրյալ մեկնաբանության, դրանցում առկա ենթադրյալ օրենսդրական բացի) սահմանադրականության հարց, ինչի կապակցությամբ Սահմանադրական դատարանի դատական կազմը հարկ է համարում արձանագրել հետևյալը.

թիվ ՎԴ/8813/05/18 վարչական գործի շրջանակներում Վերաքննիչ վարչական դատարանը 2024 թվականի մայիսի 21-ի որոշմամբ արձանագրել է հետևյալը.

«(...) Վերաքննիչ դատարանն անհիմն է համարում նաև բողոքաբերի այն փաստարկները, որ նոտար Արմեն Գրիգորյանին ներկայացված դիմումը չէր կարող դիտվել որպես պարտատիրոջ կողմից պահանջի ներկայացում, իսկ Հայցվորի կողմից Նոտարին դիմումը ներկայացվել է 16.08.2018 թվականին՝ օրենքով սահմանված վեցամսյա

ժամկետի խախտմամբ՝ հետևյալ հիմնավորումներով.

Սույն գործի փաստերի համաձայն՝ Արմեն Ստեփանի Հովհաննիսյանը մահացել է 11.11.2017 թվականին:

Հայցվորի կողմից 07.05.2018 թվականին կազմված դիմումի համաձայն՝ Վյաչեսլավ Ասրյանը «Երևան» նոտարական տարածքի նոտար Արմեն Գրիգորյանին հայտնել է, որ 11.11.2017 թվականին մահացել է Արմեն Ստեփանի Հովհաննիսյանը, ում նկատմամբ ունի ընդհանուր 178.500 ԱՄՆ դոլարի չափով դրամական պահանջ: Ղեկավարվելով Քաղաքացիական օրենսգրքի 1243-րդ հոդվածի պահանջներով՝ դիմումով ներկայացրել է իր դրամական պահանջը, խնդրել է ժառանգատուի ժառանգներին ժառանգության իրավունքի վկայագիր տրամադրելու դեպքում ժառանգական զանգվածի մեջ ներառել ժառանգատուի իր նկատմամբ ունեցած 178.500 ԱՄՆ դոլարի չափով պարտավորությունը: Նշված դիմումը նույն օրը գրանցվել է սեղանամատյանում 1552 համարով (...):

Վերը նշված փաստաթղթի բովանդակությունից ուղղակիորեն հետևում է, որ այն ներկայացվել է օրենքով սահմանված ժամկետում՝ ՀՀ քաղաքացիական օրենսգրքի 1243-րդ հոդվածի պահանջներին համապատասխան, որպիսի ապացույցով հերքվում է բողոքաբերի փաստարկներն առ այն, որ նոտար Արմեն Գրիգորյանին ներկայացված դիմումը վավերացվել է նոտարի կողմից որպես հայտարարության, այն չէր կարող դիտվել որպես պարտատիրոջ կողմից պահանջի ներկայացում, իսկ Հայցվորի կողմից նոտարին դիմումը ներկայացվել է 16.08.2018 թվականին»:

Միաժամանակ, վերոնշյալ որոշմամբ Վերաքննիչ վարչական դատարանն արձանագրել է.

«Տվյալ դեպքում, հաշվի առնելով այն հանգամանքը, որ Հայցվորը պահանջը ներկայացրել է ժառանգության բացման պահից վեցամսյա ժամկետում, այսինքն՝ պահանջի իրավունքը չի դադարել, վերջինս ձեռնարկել է սեփականության իրավունքի պաշտպանությանն ուղղված ակտիվ գործողություններ, Վերաքննիչ դատարանը գտնում է, որ բողոքաբերի կողմից ներկայացված փաստարկները չեն կարող հիմք հանդիսանալ բողոքը բավարարելու համար»:

Այսպիսով, Վերաքննիչ վարչական դատարանը թիվ ՎԴ/8813/05/18 վարչական

գործի շրջանակներում կայացրած վերոշարադրյալ որոշմամբ հաստատել է, որ պարտատեր Վյաչեսլավ Ասրյանը համապատասխան դիմումով իր դրամական պահանջը նոտարին ներկայացրել է դեռևս 2018 թվականի մայիսի 7-ին՝ օրենքով սահմանված վեցամսյա ժամկետի պահպանմամբ:

Վերաքննիչ վարչական դատարանը նաև հստակ ընդգծել է, որ նշված դիմումով պարտատեր Վյաչեսլավ Ասրյանը խնդրել է ժառանգատուի ժառանգներին ժառանգության իրավունքի վկայագիր տրամադրելու պարագայում ժառանգական զանգվածի մեջ ներառել ժառանգատուի՝ իր նկատմամբ ունեցած 178.500 ԱՄՆ դոլարի չափով պարտավորությունը:

Հետևաբար՝ Դիմողների կողմից ներկայացված պնդումներն առ այն, որ պարտատեր Վյաչեսլավ Ասրյանը համապատասխան դիմումով իր դրամական պահանջը նոտարին ներկայացրել է օրենքով սահմանված վեցամսյա ժամկետից հետո՝ միայն 2018 թվականի օգոստոսի 16-ին, անհիմն են: Չեն հիմնավորվում նաև պարտատեր Վյաչեսլավ Ասրյանի կողմից համապատասխան դիմումով իր դրամական պահանջը օրենքով սահմանված վեցամսյա ժամկետից հետո ներկայացնելու պարագայում դրանից բխած, դրան հաջորդած հետևանքների առաջացման, և արդյունքում՝ Դիմողների հիմնական իրավունքների խախտման հանգեցնելու վերաբերյալ վերջիններիս պնդումները:

Վերոշարադրյալի հաշվառմամբ՝ Սահմանադրական դատարանի դատական կազմն արձանագրում է, որ Դիմողները սույն անհատական դիմումի շրջանակներում բավարար կերպով իրավաբանորեն չեն հիմնավորել իրենց՝ Սահմանադրության 60-րդ հոդվածով երաշխավորված՝ համապատասխանաբար սեփականության և դրանից ածանցվող՝ ժառանգելու հիմնական իրավունքների խախտման փաստը, հետևաբար նաև՝ տվյալ հիմնական իրավունքների ենթադրյալ խախտման փաստի և վիճարկվող դրույթների (իրավակիրառ պրակտիկայում դրանց տրված ենթադրյալ մեկնաբանության, դրանցում առկա ենթադրյալ օրենսդրական բացի) միջև պատճառահետևանքային կապի անմիջական առկայությունը:

Անհատական դիմումի շրջանակներում նորմատիվ իրավական ակտի դրույթի սահմանադրականությունը վիճարկելու պարագայում անհրաժեշտ է բավարար կերպով



իրավաբանորեն հիմնավորել, որ վիճարկվող դրույթները (իրավակիրառ պրակտիկայում դրանց տրված ենթադրյալ մեկնաբանությունը, դրանցում առկա ենթադրյալ օրենսդրական բացը) հանգեցրել են Սահմանադրության 2-րդ գլխում ամրագրված առնվազն որևէ հիմնական իրավունքի և (կամ) ազատության խախտման, ինչը սույն պարագայում տեղի չի ունեցել:

Վերոշարադրյալի հաշվառմամբ՝ Սահմանադրական դատարանի դատական կազմը գտնում է, որ սույն անհատական դիմումն **ակնհայտ անհիմն է, ինչը գործի քննությունը մերժելու հիմք է:**

Ելնելով վերոշարադրյալից և ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 6-րդ կետով և 69-րդ հոդվածի 5-րդ մասով, Սահմանադրական դատարանի դատական կազմը

**Ո Ր Ո Շ Ե Ց .**

Լիանա Մինասյանի և Իվետտա Հովհաննիսյանի անհատական դիմումով գործի քննությունը մերժել:

Նախագահող՝

Անդամներ՝



Ա. Վաղարշյան

Հ. Հովակիմյան

Վ. Գրիգորյան